



邃古記序



稽邃故之茫芻也若幽介莫詰故載言則神乎誕遼傳則  
限乎濶而廻聽則錯乎熒為乎不可世格也而譏若蕩惡  
若荒將禪通而上上而混敦不濛乎蔑哉宗侯鬱儀氏以  
孔子敘書始堯是為紀道溯堯而首盤古氏則豈其若亡  
若夢億無得而徵乎一哉存乎徵存亡乎徵亡簡乎徵簡  
僻乎徵僻則猶墳典之逸緒也吾志乎史與事而已吾揆  
乎仲尼之志伍同參異蘄不戾乎道斯已矣是故天地肇  
位盤古首君神天聖地乃述盤古洞神記皇溯及初中豈  
不益荒長源倨之爰綴丹壺旅撫則支粵考天靈斟元陳



樞無爲化成乃述天皇神聖十二爰定三辰荒極是治乃  
述地皇九頭別長結繩刻木太古未往乃述人皇五龍攝  
提以逮敘命命曆叵稽循蜚而後丹壺紀世詎曰不謬大  
巢監穴構木槽巢避害人悅乃述有巢遂皇教燔漁水范  
金夫婦遂倫乃述燧人庖犧繼燧始教十言六佐成務八  
卦始畫決疑通德圖書是則九九裁制分節定元立部以  
勢後有女皇正姓辨婚神化無方次有大庭又十三氏襲  
號禪繩乃述太昊炎帝繼作教民穀食鞭草別藥通市作  
蜡圖地經國重演八卦旣伐補遂夙沙自定相傳八世乃  
述神農有熊習兵三戰阪泉蚩尤復刑是代神農立輔制

官常先大鴻聿昭袞冕備棟制刀文字始譔定歷制鐘論  
醫作占畫壘建封職天經地紀倫序物龍龜兆異乃述黃  
帝厥嗣登位鳳鳥適至民無疵癘乃述少昊九黎亂德高  
陽起正民事是亟共工則討曆象初作式脩常道乃述顓  
頊高辛繼世命堯爲侯執中而治乃述帝嚳堯受世推敦  
睦平章曆象授時明禁廣詢治兵服蠻節儉身敦仁昭義  
立德博化廣俊又畢集禮樂旣備麟鳳來遊使舜攝位乃  
述陶唐帝舜好學三徙風移取善是樂孝友夙聞帝試二  
女瞽若其神試政政舉攝位受終承天立府曰在璣衡類  
裡望徧輯瑞頒行巡狩四岳兆州十二封濬地絡爰作象



刑四臯咸服惟恤惟明踐位格祖詢闡明達愷元克舉禹  
棄稷契臯陶益垂夷夔竝列爰定車服簡官貞貢布功散  
德恭已無爲式舞干羽有苗其來乃述有虞其鉅而經天  
奠地歷而神聖君輔興衰亂理博而禮樂兵刑書卜星歷  
數醫雩祓不可物紀者鬱儀莫不定其經覈以緯芟其蔓  
澤以雅使人若閱萬歲以前而不熒其誕濶焉則其功三  
五之隆不倍於倚相乎哉或謂倚相而讀墳典則墳典爲  
不亡逮孔子刪而諸子百家泯然紀乎墳典則墳典爲不  
盡存况易首伏羲書記堯舜其典存二其墳去三惡乎取  
刪者而博志之哉無亦餘於史事不足於道乎不然則豈  
欲勝仲尼者乎曰否夫子非惡其扈也法訓未具則匪經  
匪則闕是以述史自唐大堯君舜而謂一日辯聞古昔爲  
躁也夫道太古則猶今齊州耳傳昏忽則猶今耳目耳而  
人則今信古疑今疑古信以及乎晝不信信夢存不信信  
亡者可不謂僂哉今鬱儀夢寐三五如身際焉慨譙皇甫  
東項氏之藉已湮而路史猶未沒也病其忝恠不能闕文  
則將孰信古歟是其師仲尼之信述而服闕疑之教者也  
其述而淵質簡雅經經而竒緯焉則亦上古之書矣萬曆  
三十六年七月七日綏安後學謝兆申謹序



邃古記序

勅理石城王府事鎮國中尉謀璋字鬱儀撰



邃古者何三皇五帝之世也三皇之事若存若亡五帝之事若覺若夢億不識一予何所據以記之哉據三墳五典而追記之也上古聖神制作以利萬世其功直與天地相配吾屬享其利而蒙其功柰何不知其所自邪此吾邃古記之所由作也墳典尚矣然而春秋戰國之間楚史倚相能讀之墳典未嘗亡也彼春秋戰國之間夫人而能讀之豈徒一楚史哉乃今諸子百家所稱三五之事雖多漶漫竒僻要之無不自墳典出也第識有精猶故記有淳駁焉



耳吾因諸子百家而得墳典之略焉吾又取秦漢以下有足證邃古者而裨益之叅伍異同以求其近是者而經緯之即一言一事吾不自臆出也欲使覽者信其有本也典自黃顛而爲五仲尼刪書墳去三典存二非爲其厖也先唐虞者肇人紀而前民用者也或因或革或損或益制度未一也或經或權或巨或細法訓未備也仲尼以爲於吾尚書姑闕之使彼自行焉是仲尼刪書之意也仲尼刪之而予小子顧追記之得無異于聖人之旨乎仲尼志於道予小子志于史仲尼志於言而予小子志於事兩不相害也奚必同哉昔之志邃古者多矣以予所聞譙氏之史考

皇甫之世紀束氏之啓蒙項氏之始學以及羅氏之路史皆可謂好古者也乃今羅氏之史獨傳夫羅氏豈必賢于譙皇甫束項氏哉四氏遠而羅氏之世近也千載之後烏知羅氏史之不共四氏湮沒乎何也考古者未有不依乎舊聞者也苟一出入斷自厥衷錯以竒恠文則美矣誰能信其不我誕乎是故多聞闕疑慎言其餘述而不作信而好古是考古者之所當尚也予雖割截羣言簡樸空濶不能當路史萬一然三五之蹟鑿鑿有據大略備于此矣博雅君子弘而益之不幾三墳五典之舊哉

萬曆三十六年戊申歲孟秋朔日書



邃古記卷之一



南昌朱謀埠鬱儀甫撰



盤古氏第一

天地肇位首生盤古氏爰開混茫君臨天下

帝王五運歷年記云元氣濛鴻萌芽茲始遂分天地肇

立乾坤啓陰感陽分布元氣乃孕中和是爲人也首生

盤古後乃感化而有黎氓 地理神鑑云盤古氏龍首

人身一曰渾沌氏 元氣論云盤古之君龍首蛇身嘘

爲風雨吹爲雷電開目爲晝闔目爲夜死後骨節爲山

陵腸胃爲江海毛髮爲草木 徐整三五歷紀云天地



渾混如雞子盤古生其中萬八千歲天地開闢陽清爲天陰濁爲地盤古在其中一日九變神于天聖于地天日高一丈地日深一丈如此萬八千歲天極高地極深盤古極長 胡氏皇王大紀云盤古生於大荒莫知其始明天地之道達陰陽之變爲三才首君於是混茫開矣 陳桎編年云太極生兩儀兩儀生四象四象變化而庶類繁矣相傳天地開闢首出御世者曰盤古氏又曰渾敦氏 羅泌路史曰盤古氏生而神靈一日九變蓋元混之初陶融造化之主也今贛之會昌有盤古山湘鄉有盤古保零都有盤古祠荆湖南北以十月十六

日爲盤古氏生辰俗以其日候月之陰晴 元豐九域志云廣陵有盤古家廟 任昉述異記南海有盤古氏墓亘三百餘里俗云後人追塋盤古之魂也桂林有盤古氏廟今人祝祀之南海盤古國皆以盤古爲姓昔盤古氏死頭爲四岳目爲日月脂膏爲江海毛髮爲草木秦漢間俗說盤古氏頭爲東岳腹爲中岳左臂爲南岳右臂爲北岳足爲西岳吳楚間說盤古氏夫妻陰陽之始也喜則爲晴怒則爲陰

### 天皇氏第二

天皇氏斟元陳樞與乾曜合元澹泊無爲而俗自化號曰



天靈

遁甲開山圖云天皇出於柱州無外之山在崑侖東南  
萬二千里 春秋保乾圖云天皇斟元陳樞以立易威  
宋均注云威則也言斟酌元氣陳列樞機之行以改立  
先法 易通卦驗曰天皇氏之先與乾曜合元君有五  
期輔有三名宋均注云君之用事五行更王者亦有五  
期三輔公卿大夫也 河圖括地象云天皇九翼提名  
旋復注云翼輔爲治者蓋有九人 五運歷年記云盤  
古之後三皇之前人皆裸形自稱黑頭蟲 徐整三五  
歷云溟滓始牙濛鴻滋萌歲起攝提元氣肇啓有神聖

人十三頭號曰天皇 鶡冠子云泰上成鳩之道一族  
用之萬八千歲陸農師注云成鳩蓋天皇之別號 司  
馬貞史記補云天地初立有天皇氏十二頭澹泊無所  
施爲而俗自化木德王歲起攝提兄弟十二人立各一  
萬八千歲蓋天地初立神人首出行化故其年世長久  
也 劉恕外紀天皇之時五運始興大化始立人風真  
淳不殫形色故澹泊無爲而俗自化 太微黃書云天  
皇象符以合元氣長生之要靈書八會字無正形 陳  
經編年云天皇繼盤古氏以治是曰天靈始制干支之  
名以定歲之所在埤按十干甲乙丙丁之類以命日子



遷古詩一  
丑寅卯之類以命月厥後乃有闕逢旃蒙困敦赤奮若  
之名天皇古樸不能爾也 真源賦云盤古後有天皇  
十三人時遭劫火乃有地皇 羅泌路史云天地成位  
君臣道生粵有天皇是曰天靈望獲強尊頡顛三舌驤  
首鱗身碧盧禿揭首出庶物君有五期寔司元化歲紀  
攝提斟元陳樞以立易威秉錄司契無文不懷乾曜迨  
元像符合氣亭毒萬有風行焱逝靈書八會自然洞神  
玉券十華人風真淳體真得極提名旋復無門無毒神  
運四奧被迹無外無陵之陵三輔九翼爲世億齡

地皇氏第三

地皇氏十有二君爰定三辰治八荒四極以侔地利

遁甲開山圖云地皇氏出於雄耳龍門之岳十有一君  
皆女面龍額而馬蹠各萬八千歲榮氏解云地皇兄弟  
九人蛇身獸足面貌如女 三五歷紀云有神聖十二  
頭號曰地皇 帝系譜天皇以木王地皇以火紀 洞  
神經云地皇主治八荒四極四海山川谿谷上協天德  
下侔地利 高氏小史云地皇爰定三辰是分晝夜朔  
望以三十日爲一月 路史云地皇氏岳姓鏗名出於  
熊耳龍門之山馬蹠妝首十一龍君迭辟繼道主治荒  
極雲章載持逮天協德與地侔資太始之元上成正一



不生不化覆却萬物得道之秉立乎中央神與化游鸞  
集龍興草榮木替亦號萬齡

### 人皇氏第四

人皇氏九君別長九州結繩刻木而治寔爲九頭之紀亦  
號泰皇

雜書人皇出於刑馬山提地之國繼地皇之後兄弟別  
長九州爲九圍已居中州以制八輔離良地精生女爲  
后夫婦之道始焉注云刑馬山今在秦州 春秋命曆  
叙曰人皇氏九頭駕六羽乘雲車出谷口分九州 開  
山圖注云人皇兄弟九人其身九色 項峻始學篇曰

人皇九頭兄弟各三百歲依山川土地之勢財度爲九  
州各居一方因是而區別 真源賦云人皇結繩刻木  
而治 史記云古有天皇地皇泰皇而泰皇最貴 孔  
衍春秋云泰皇乃人皇也張晏云人皇九頭是曰泰皇  
即九頭紀也 韋昭洞歷云人皇九人所謂九皇 鵠  
冠子云九皇之制主不虛王臣不虛貴 太平經云三  
皇之時人皆氣清深知天地之至情故悉得至道 補  
史記云人皇兄弟九人分長九州各立城邑凡一百五  
十世合四萬五千六百年 三五歷紀云天皇地皇人  
皇爲太古 路史云人皇胡洮其身九章龍軀驤首而



達腋才山川爲九圍九男別居一方號居方氏爲人立命守一得妙人氣自正爰役風雨以御六氣昭明神靈光際無臬爲世之日與兩皇並隆謂之泰皇者以其阜民物備君臣政治之足貴也

按春秋命曆叙人皇之後有五龍紀攝提紀合雒紀連通紀叙命紀循蜚紀因提紀最後有禪通紀十六氏而庖犧繼焉所謂循蜚紀者鉅靈句疆譙明涿光鉤陳黃神玃神犁靈大騶鬼騶弇茲泰逢冉相蓋盈大敦雲陽巫常泰壹空桑神民倚帝次民凡二十二氏所謂因提紀者皇次蜀山魍魎渾敦東戶皇覃啓統吉夷几渠豨

韋大巢遂皇庸成凡十三氏所謂禪通紀者史皇栢皇中央大庭栗陸麗連軒轅赫胥葛天尊盧祝融吳英有巢朱襄陰康無懷凡十六氏考之遁甲開山圖皇甫世紀鄭樵通志皆謂女媧大庭栢皇中央栗陸驪連赫胥尊盧混沌有巢朱襄葛天陰康無懷一十四氏皆襲庖犧之號唯莊子六韜以栢皇栗陸驪連赫胥尊盧祝融列在伏羲之前太平御覽暨歐徐類書叙自天皇地皇人皇即繼以有巢燧人庖犧女媧而附記大庭栢皇等十有五氏於女媧之後蓋本開山圖與世紀之所叙也今從之



有巢氏第五

有巢氏始教民構木櫓巢以避禽獸之害其爲政也予而不取愛而不惡亦號大巢氏

項峻始學篇曰上古民皆穴處有聖人作教之巢居號大巢氏 韓非子云上古人民少而禽獸多人不勝禽獸蛇虺有聖人構木爲巢以避群害而人悅之使王天下號有巢氏 禮記曰昔先王未有宮室冬則居營窟夏則居櫓巢鄭玄注云冬則居士暑則聚薪柴居其上也 莊子云古之禽獸多而人民少於是人皆巢居以避之晝拾橡栗暮栖木上命曰有巢氏之民 晏子云

古有處層巢窟穴而王天下其仁愛而不惡予而不取天下之人不朝其室而歸其仁焉 三墳云有巢氏生太古之先識於天地草木蟲魚鳥獸俾人居巢穴積鳥獸之肉聚草木之實天下九頭咸歸有巢始君也動止羣羣相聚而尊事之壽一太易本通姓氏之後也 遁甲開山圖云石樓山在瑯琊昔有巢氏治此山南王天下百有余代未詳年世 儀禮注云有巢之世民稔血食而有爭心有剝林木而戰者矣 周書史記解有巢氏有亂臣而貴任之以國假之以權擅國而主斷君已而奪之臣怒而生變有巢以亾



燧人氏第六

燧人氏出爰有四佐始鑽木取火教民熟食以刃以漁始定方名通貨幣殊尊卑別夫婦亦號遂皇

三墳云燧人氏有巢氏子也生而神靈教人炮食鑽木取火天下生靈尊事之始有日中之市交易其物有傳教之臺有結繩之政壽一太易本通姓氏之後也尸子云遂人氏察辰心而出火是時天下多水教民以漁而網罟之事萌焉尚書大傳燧人以火紀官是為燧皇白虎通燧人鑽木燧取火教民熟食養人利性避臭去毒謂之遂人禮含文嘉曰燧人氏鑽木取火炮

生為熟令人無腹疾有異於禽獸遂天之意故謂遂人古史考云太古之民吮露精食草木實穴居野處山食鳥獸水食魚鼈羸蛤未有火化腥臊多害腸胃有聖人出鑽燧出火教民熟食鑄金作刃以為斷割民用大悅號曰燧人禮記昔者先王未有火化食草木之實鳥獸之肉飲其血茹其毛後聖人有作然後脩火之利範金合土以炮以燔以烹以炙以為醴酪注云範金鑄器用合土以為瓴甃陳士元荒史云燧皇以木器善液也乃範金合土為釜甑甌甑以化物承飲而火之功用洽太乙金鏡云燧人氏始觀斗樞而定方名是為東



西南北 禮記疏云尊卑之禮夫婦之道起于遂皇

論語摘輔象曰燧人出天四佐出洛明繇曉升級畢毓

受稅俗成博受古諸隕丘受延嬉宋均注云升級者等

差政所先後也稅俗者賦稅徭役所宜施也古諸者諸

侯職等也延嬉者長興之錄也 管子云自燧人以來

未有不以輕重為天下者 杜佑通典云自燧人以逮

三王皆通貨幣輕重之法以制國用 易通卦驗曰燧

皇始握機矩表計冥圖其刻曰蒼渠通靈鄭玄注云燧

人在伏羲前作其圖謂之計冥時無書刻石而謂之且

刻曰蒼糧渠肩之人能通神靈之意也 遁甲開山圖

云燧人氏都于律高之石室治二百三十載 河南志

云燧人氏塚在歸德府西南三里闕臺之北 路史云

不周之巔有宜城焉日月之所不屆有聖人者游至其

南垂有木焉鳥啄其枝而火出於是作鑽燧別五木以

改火教民燔黍捭豚以灼以煇人无腥脍之疾人民既

鞣羽皮弗給於寒乃誨之蘇冬而煬之號遂人氏於是

窮火之用而為之政春季以出樵終以納以濟時疾鬱

攸之司九變七化火為之紀范金合土為斧重作炷高

甌甑成物化物而火之功用洽是時天下多水教民以

漁雒出四佐以代天理物乃大臣職龍圖逞瑞龜字効



靈於是占斗建而正方握幾矩表計寘指天以布躔而  
齊七政始注物虫鳥獸之名而通國之輕重以轉民之  
貨人滋反醇情欲蠢動好嗜外迫則冒禮而忘形以賤  
其神乃制男子三十而取女子二十而歸以息其民爲  
之進退以耻其凡是故父老而慈子壽而孝著之世姓  
而法自是作禮繇此顯矣

邃古記卷一終

邃古記卷之二

南昌朱謀埠鬱儀甫撰

包犧氏第七

太昊包犧氏風姓繼燧人氏以有天下

白虎通云伏羲神農祝融爲三皇以道治其下下伏而  
化之故謂之伏羲 孔演明道經云燧人在伏羲前風  
姓始王天下是以伏羲因燧皇之姓 帝王世紀云太  
昊庖犧氏風姓也蛇身人首有聖德燧人氏沒庖犧代  
之繼天而立首德於木爲百王先帝出於震未有所因  
故位東方主春象日之明是稱太昊制嫁娶之禮取犧



遷古記一  
牲以充庖厨故號庖犧氏是爲犧皇後世音謬故或謂  
之伏羲或謂之宓犧一號權皇氏 禮含文嘉曰伏者  
別也羲者獻也 三皇太古書曰伏羲爲天皇神農爲  
人皇黃帝爲地皇伏羲明天事故曰太昊炎帝明民事  
故曰神農軒轅明地事故曰黃帝 鄭樵通志云太昊  
伏羲氏亦曰庖犧亦曰皇雄氏亦作處戲或言象日月  
之明故曰太昊伏制犧牛故曰伏犧因取犧牲以充庖  
厨故號庖犧 易傳作包犧氏 王嘉拾遺記云庖者  
包也包含萬象以犧牲登薦於百神民服其聖故曰包  
犧亦曰宓犧以木德王故曰春皇明照八區是謂太昊  
生於成紀有異表聖德

路史云太昊自有庖而應世蓋其始迹之地也潛夫論  
謂有庖之國以姓太昊後也庖水在山陽平樂而太昊  
墓在山陽則其故迹無疑矣後世庖厨之說妄甚  
遁甲開山圖云伏羲生于仇夷之山其山四絕孤立  
司馬貞史補云母曰華胥履大人迹於雷澤而生庖犧  
於成紀注云天水有成紀縣 列子云伏羲女媧蛇身  
人面而有太聖之德 白虎通云伏羲祿衡連珠唯大  
目鼻龍伏作易八卦以應樞 詩含神霧云大跡出雷  
澤華胥履之生宓犧 孝經鉤命決云華胥履迹惟生



皇羲 孝經援神契云伏羲氏大目山準日角而連珠  
衡注云日角者額有骨表取象日所出房所立有星也  
珠衡者衡中有骨表如連珠象玉衡星也 春秋合誠  
圖云伏羲長九尺一寸望之廣視之專 玄中記伏羲  
龍身女媧蛇軀 靈光殿賦云伏羲鱗身 帝系譜伏  
羲人頭蛇身以十月四日人定時生 拾遺記云庖犧  
之母遊于華胥之洲有青虹繞之而娘歷十二年乃生  
庖犧長頭修目龜齒龍脣眉有白毫鬚垂委地文物禮  
義於茲始作

始作十言之教著三綱六紀以定人道

六藝論云伏羲作十言之教 白虎通云古未有三綱

六紀民人但知其母不知其父能覆前而不能覆後則

則誅誅起則吁吁饑即求食飽即弃餘茹毛飲血而衣

皮革一作皮葦於是伏羲仰觀俯察因夫婦正五倫始定人

道天下化之 古史考云伏羲始制嫁娶以儷皮爲禮

典略云皇羲以來始有君臣上下之事 通志云伏羲

法乾坤以正君臣父子夫婦之義埒按夫婦父子兄弟

君臣朋友所謂十言之教也舊說八卦并吉凶者誤矣

爰立六佐以成天下之務

論語摘輔象曰伏羲氏時六佐出世金提主化俗鳥明



王建福視默主災惡紀通爲中職仲起爲海陸陽侯爲  
江海宋均注云宓戲不及燧人故增二佐建福者福利  
于民也中職者爲田主主內職也海陸者主平地兼統  
海也江海一作江湖 路史云伏羲舉六佐以自策命  
金提繇俗指苦蓋謹窖藏視之未居者借力成之以靖  
敷民命鳥明建方泝窾木絕港道以濟不通奠八方旌  
九位而分九土命視冒爲駐志災惡察虛實居百鵠以  
平民命紀侗中職定于中邦命仲起司陸陽侯司海六  
佐職而天地位陰陽得乃體春秋明刑政脩兵仗以威  
懷蹇修爲士以之御敗而下情至於是和率萬民平水

土道泉原因水居方而置城邑百令具舉

以龍紀官是爲龍師

左傳郊子云太皞氏以龍紀官故爲龍師而龍名服虔  
注云太皞龍師春官青龍氏夏官赤龍氏中央黃龍氏  
秋官白龍氏冬官黑龍氏孔穎達謂此五官舊無所見  
苟出肺腸不可憑用 三墳云伏羲氏時龍馬負圖命  
臣飛龍氏造六書命臣潛龍氏作甲曆伏制犧牛冶金  
成器教民炮食易九頭爲九牧因尊卑爲禮儀因龍出  
而紀官因鳳來而作樂命降龍氏何率萬民命水龍氏  
平治水土命火龍氏炮治器用因居方而置城郭 伏



犧皇策云命子襄居飛龍氏主圖文子英居潛龍主陰  
陽甲曆上相共工下相皇桓飛龍朱襄氏潛龍昊英氏  
居君左右栗陸氏居北赫胥氏居南昆連氏居西葛天  
氏居東陰康氏居下九州之牧各統其人羣居於外命  
栗陸子居水龍之位主養草木開道泉源命大庭氏主  
屋室命陰康子居水土俾民居處無或漂流命渾沌子  
居降龍之位惟主於民 鄭樵通志云伏羲命子襄為  
飛龍氏造六書子英為潛龍氏造甲曆栗陸為水龍氏  
繁滋草木疏導泉原混沌為降龍氏驅除民害大庭氏  
主屋廬為民居處陰康氏主水土為民田里於是共工  
為上相栢皇為下相朱襄昊英常居左右栗陸居北赫  
胥居南昆連居西葛天居東陰康居下分牧九州而天  
下化洽 風俗通云混沌氏者太昊之良佐 春秋文  
耀鈞云伏羲作易各官

始畫八卦作卜筮以通神明之德以斷天下之疑

易繫辭曰包犧氏之王天下也仰觀象於天俯觀法於  
地觀鳥獸之文與地之宜近取諸身遠取諸物於是始  
作八卦以通神明之德以類萬物之情 禮記曰龜曰

卜著曰筮卜筮者先王所以決嫌疑定猶豫明是非也

禮含文嘉云伏羲德洽上下天應以鳥獸文章地應以



河圖洛書乃則象而作易 尚書傳云伏羲氏王天下  
龍馬出河遂則其文以畫八卦謂之河圖埴按龍馬者  
龍與馬合而生駒其背文為太極四象之圖以其濱河  
所產之駒故曰河圖伏羲以四象之中有太陽太陰少  
陽少陰故列之為八卦文王周公推明其事故於乾爻  
取象於龍坤卦取象於牝馬父天母地之義也 圖經  
云兗州鄒縣西南五十里鳧山之上有伏羲廟遺址相  
傳伏羲畫卦於此彼中呼為八卦山陳州有白龜池伏  
羲於蔡水得白龜處蔡州上蔡縣有白龜祠祠旁有著  
草叢生如蒿高五六尺一本二十莖至多者三五十莖

生便條直異於衆蒿 鄭魴記云伏羲得神著而乘皇  
策黃帝受河圖而定玉籙 古史考云伏羲作卦始有  
筮殷巫咸善占筮 鄭樵通志云伏羲始畫八卦卦有  
三爻重之為六十四名曰連山出三墳  
造書契以代結繩之政

易曰上古結繩而治後世聖人易之以書契百官以治  
萬民以察蓋取諸夬 易通卦驗云宓犧方牙蒼精作  
易無書以畫事鄭玄云宓犧時質樸作易以為政令而  
不書但以畫其事之形象而已蓋六書中象形會意指  
事之本也 三墳云太昊命子襄居飛龍氏作六書



司馬貞史補云太皞造書契以代結繩之政 通志云  
傳謂法始乎伏羲言圖象書契於此乎始 路史云太  
昊作龍書以立制號而同文稽夬象肇書契以代結繩  
之政百官以治萬民以察而文籍繇是興矣埤按古者  
刻木爲齒而中判之彼此執一以合符故曰執左契故  
曰宋人得遺契於道而密數其齒春秋戰國之世尚然  
用契今滇南夷猶用木契以相質

作九九之數以裁制萬物

管子云處犧氏造六峯以迎陰陽作九九之數以合天  
道而天下化之周人之王循六峯行陰陽處犧以來未

有不以輕重而能成其王者也 黃佐樂典云包犧氏  
造六虛以迎陰陽即六律也 周髀云古者包犧立周  
天曆度之數數之法出於圓方圓出於方方出於矩矩  
出於九九八十一故折矩以爲勾廣三股修四徑隅五  
既方之外半其一矩環而共盤得成三四五兩矩共長  
二十有五是謂積矩故禹之所以治天下者此數之所  
生也凡用矩之道平矩以正繩偃矩以望高覆矩以測  
深卧矩以知遠環矩以爲圓合矩以爲方方屬地圓屬  
天天圓地方方數爲典以方出圓筮以寫天天青黑地  
黃赤天數之爲筮也青黑爲表丹黃爲裏以象天地之



位是故知地者智知天者聖智出於勾勾出於矩夫矩之於數其裁制萬物唯所為耳

分八節而定曆元審地勢而立九部

尸子云伏羲始畫八卦列八節而化天下神農氏治天下立四時之序 春秋內事云伏羲定天地之位分陰陽之數推列三光建分八節以爻應氣凡二十四氣消息禍福以制吉凶先時天地開闢五緯各在其方至伏羲時乃合故以為曆元 後漢志云虞羲作易紀陽氣之初以為律法建日冬至之聲以黃鍾為宮太簇為商姑洗為角林鍾為徵南呂為羽應鍾為變宮蕤賓為變

徵此聲氣之元五音之正也 三墳云命子英居潛龍

主陰陽甲曆曆起甲寅甲日寅辰乃鳩眾於傳教臺告

民示始 易坤靈圖曰伏羲立九部而民易理蓋九州

之始也 拾遺記云庖犧氏規天為圖矩地取法視五

星之文分晷景之度使鬼神以致羣祠審地勢以定川

岳 路史云伏羲畫地之利分壤時穀以制國用

始名物蟲鳥獸創器用幣帛琴瑟

春秋命曆叙云伏羲燧人始名物蟲鳥獸 禮外傳曰

伏羲以儷皮為幣 路史云太昊幣謂之九棘 皇圖

要覽云太昊化蠶桑為總帛 白帖云伏羲作布 世



本云伏羲造琴瑟是始為樂琴長七尺二寸上施五弦  
瑟五十弦 高氏小史云太昊作二十五弦之瑟 古  
史考云伏羲制嫁娶以儷皮為禮作琴瑟以為樂 楊  
子法言云法始乎伏犧而成乎堯匪伏匪堯禮義峭峭  
也 桓譚新論云宓犧制杵臼 世紀云太昊制九鍼  
以拯天枉嘗百草以制民疾作瑟長八尺一寸三十有  
六弦 琴書云伏羲氏王天下削桐為琴弦桑為瑟以  
修身理性反其天真禦邪辟而防心淫

作網罟教民畋獵養犧牲充庖厨  
易繫曰包犧氏作結繩而為網罟以佃以漁蓋取諸離

世本云伏羲之臣勾芒氏始作羅網 尸子云宓犧之  
世天下多獸教人以獵 司馬貞史補云太皞養犧牲  
以充庖厨據按前此禽獸之肉皆取諸野太昊始畜雞  
豚牛羊以充庖稱曰伏犧有以哉 崔寔政論太昊之  
世設九庖之官 古史考云伏羲觀蒙面而作網 抱  
朴子云太昊師鬲菴而結網 夏侯湛辨樂論云伏羲  
氏因時興利教民田漁天下歸之時則有網罟之歌  
定都于陳作扶來之樂

左傳云陳太皞之墟也 世紀云庖犧氏都陳今陳留  
宛丘是也 九域志陳蔡俱有伏羲八卦壇宛丘北一



里有伏羲廟交單皆有伏羲陵 杜氏通典云伏羲樂  
名扶來亦曰立本 陳氏世編云伏羲氏作荒樂歌扶  
徠詠網罟以鎮天下之人命曰立基

其為政也教而不誅理沉滯絕戾物功揆天地

商子云伏羲神農教而不誅黃帝堯舜誅而不怒

趙策語同

文子云虞犧氏之王天下也枕矩寢繩殺秋約冬負方  
州抱員天陰陽所擁沉滯不通者竅理之逆氣戾物傷  
民厚積者絕止之其民童蒙不知西東視瞑瞑行躡躡  
侗然自得莫知其所由浮游汎然不知所本自養不知  
所如往當此之時禽獸蟲蛇無不懷其爪牙藏其螫毒

功揆天地然而不章其功不揚其名隱真人之道以從  
天地之固然何則道德上通而智故消滅也 荒史云  
伏羲氏之為治也負方抱圓體一統乾不是賢而非愚  
不沽巧而尚行去羨去慕惟以道化是以百姓足而宇  
宙寧官無供備之民而死不用槨事簡俗淳君親尊而  
臣子順星辰溫潤鬼神受職功揆上下後世不可及也  
包犧氏衰女媧氏繼作是為女皇

劉恕外紀云庖犧元起辛巳按世紀云包犧在位一百  
二十年塋南郡或云冢在山陽高平之田 司馬貞史  
補云在位百一十年塋襄陽其後裔當春秋時有任宿



遷古記二  
須句顓臾皆風姓之胤也 真源賦云伏羲在位一百六十四載壽百九十有四歲 通志云在位百十六年 女媧氏亦風姓承包犧制度治于中皇之山

世紀云女媧氏風姓承包犧制度蛇身人首一號女希是為女皇 春秋運斗樞云處犧女媧神農為三皇皇者中也合元履中開陰布綱上合皇極其施光明指天畫地神化潛通 春秋世譜云華胥生男子為伏羲女子為女媧故世言女媧乃伏羲之妹 史補云女媧氏有神聖之德代宓犧立號曰女希氏無所革造唯作笙簧故易不載不承五運亦木德王蓋宓犧之後已經數

世金木輪環周而復始特舉女媧以其功高而充三皇故頻木王也 路史云女媧雲姓治于中皇山山在今平利上有女媧廟與伏羲山相接伏羲山在西城女媧山在平利 寰宇記女媧生于承匡山山在任城縣 始正姓氏辨婚姻用媒妁

帝王世紀云太昊始立姓氏而女媧正之 風俗通曰女媧禱祠神祇而為女媒因置婚姻行媒妁以重萬民之判 路史云後世有國者以女媧載媒故祀之為皐祺之神

制笙管作筭總



禮明堂位云女媧之笙簧 世本云隨始作笙簧注云  
女媧之臣也許氏說文云隨作笙女媧作簧 帝系譜  
云女媧命娥陵氏制都良之管以一天下之音命聖氏  
制頌篴以合日月星辰以易兆之晨作充樂樂成天下  
幽微無不得其理 事始云女媧造簫 隋音樂志云  
笙竽竝女媧之所作 春秋世譜云女媧作笙簧張雲  
幕枚占神明能變化萬物 路史云女媧用五弦之瑟  
於澤丘動陰聲極其數而為五十弦以交天侑神聽之  
悲不能克乃破為二十五弦以抑其情具二均聲樂成  
而天下幽微亡不得其理 二儀實錄云燧人之世髻

而無繫女媧之女繩以羊毛結繫向後命曰頭須取荆  
枝及竹為筭以貫髮 論語疏云女媧尚白神農尚赤  
維時共工亂政強伯九有以隘制天下女媧起而克之

管子云共工之王水處十之七陸處十之三乘天勢以  
隘制天下 魯語展禽曰共工氏之伯九有也其子后  
土能平九土故祀以為社韋昭注云共工氏伯者在戲  
農之間 世紀云女媧之末諸侯有共工氏任智刑以  
強伯而不王 張湛列子注云共工氏興霸於伏羲神  
農之間其後苗裔恃其疆與顓頊爭為帝也 路史云  
太昊氏衰共工惟始作亂振滔洪水以禍天下墮天綱



絕地紀覆中冀人不堪命於是女皇氏役其神力以與共工氏較滅共工氏而遷之

四極正冀州寧地平天成萬民復生

列子云天有不足故女媧氏練五色石以補其闕斷鼇之足以立四極 淮南子云往古四極廢九州裂天不兼覆地不周載火熾炎而不滅水浩洋而不息猛獸食顓民鷲鳥攫老弱於是女媧鍊五色石以補蒼天斷鼇足以立四極殺黑龍以濟冀州積蘆灰以止滂水蒼天補四極正滂水涸冀州平狡蟲死顓民生考其功烈上際九天 下契黃壚各聲被後世光輝重萬物 張湛列

子說云陰陽失度三辰盈縮是使天地之闕不必形體虧殘也女媧神人故能練五常之精以調和陰陽使晷度順序不必以噐質相補也 路史發揮云共工傲擾

天紀地維用絕天柱為折斯大亂之極也女媧氏奮其一怒滅共工而平天下四土復正萬民更生此列子所謂補天立極之功矣共工氏侯國也自謂水德為水紀跋扈恣睢蓋在冀土故傳有女媧濟冀州之說是女媧逮平共工之亂明甚 圖經云平定州有東西浮化二山皆有女媧廟其東浮山即媧氏補天之處其煉石竈尚存所產諸色石亦可燒云 陸文裕河汾錄云女媧



鍊五色石遺竈在平定之東浮山蓋後世燒煤所始也  
埤按阮籍詩云姦龍沉冀州妖女不得眠蓋古有畜龍  
共工氏司水而擾之因以驅龍作水而亂天下勝水者  
莫如火故女媧教民鍊石之可藝者以禦龍蛇之患用  
燥勝濕亦事理之當然後世神其道而譌傳曰補天耳  
神化無方不設法度而以至德遺於後世

淮南子云女媧七十化高誘注云七十變造化此言造  
化治世非一人之功也 王逸楚辭注云女媧人頭蛇  
身一日七十化其體 路史云女媧氏道標萬物神化  
七十噐車出澤馬來川岳效靈歆緯應理 淮南子云

伏羲女媧不設法度而以至德遺於後世何則至虛無  
純一而不嚶喋苛事也

但落之後塋於閔鄉是爲風陵

真源賦云女媧元年甲子治百三十載 九域志云女

媧墓在今潼關口河灘上屹然介河有木數株雖暴漲

不漂沒也今屬陝之閔鄉縣又任城東南三十九里有

女媧陵晉州有女媧廟 戴延之西征記潼關直北隔

河望層阜巋然獨秀謂之風陵伏羲女媧風姓也此當

是女媧之墓 寰宇記閔鄉津去河東縣三里卽風陵

故關也風陵城在其下女媧之墓秦漢以來俱係祀典



唐曆云天寶十三年五月天雨晦冥閩鄉女媧塚俄失  
所在乾元元年六月朔日復出河濱夾樹兩柳肅宗命  
祝史祠焉 喬潭女媧陵記云登黃龍古塞望洪河中  
流巋然獨存大浸不溺者媧皇陵也君子曰夫能屠黑  
龍涸九州况乎一水之上而自為謀夫能斷鼉足立四  
極况乎數仞之高而自為力乎上有積草表以孤樹常  
感風氣纖條悲鳴冥應胙蠻往來無不加敬焉

女媧氏既没大庭氏栢皇氏中央氏栗陸氏驪連氏赫胥  
氏尊盧氏祝融氏混沌氏昊英氏葛天氏陰康氏朱襄氏  
無懷氏王有天下皆襲包犧之號

遁甲開山圖云自女媧大庭栢皇中央栗陸驪連赫胥  
尊盧祝融混沌昊英有巢葛天陰康朱襄無懷凡十五  
氏皆襲包犧之號合一萬七千七百八十七歲

帝王世紀云女媧氏没次有大庭栢皇中央栗陸驪連  
赫胥尊盧混沌有巢朱襄葛天陰康無懷凡十三氏皆  
襲庖犧之號史經不載莫知都之所在與年數多寡  
六韜云柏皇栗陸驪連軒轅赫胥尊盧祝融古之王者  
也在伏羲神農之間皆教民而不誅

莊子云赫胥氏尊盧氏祝融氏伏羲神農皆結繩而用  
之號至治之世 乾坤鑿度云混沌氏授天英氏天英



授無懷氏無懷之中孫為神農 古史考云伏羲次有三姓至女媧女媧五十姓至神農神農相承八代共五百二十年 宋均緯注云女媧至神農七十二姓 楊朱云伏羲以來三十餘萬歲

丹壺名山記云倉頡一世栢皇二十世中央四世大庭五世栗陸五世麗連十一世軒轅三世赫胥一世葛天四世宗盧五世祝融二世昊英九世有巢七世朱襄三世陰康二世無懷六世凡八十八世是為禪通之紀

埜按魯曲阜有大庭氏之庫鄭為祝融之虛事見左傳昊英之世民始伐木殺獸事見商子栗陸之季殺諫臣

東里子天下以叛事見鄧析子葛天作八闕之樂陰康氏作大舞以宣導鬱闕朱襄氏命其臣士達作五絃之瑟以來陰氣事見呂覽藍田山之西有尊盧氏冢事見後魏風土記此皆可考見者鄭樵通志乃謂大庭栢皇等十三氏皆臣於伏羲為諸侯分九牧而理天下蓋據三墳朱襄造六書昊英造甲曆之說不知三墳乃毛漸偽撰非上古舊文也信近而不信遠可也信偽書而疑古傳記其可乎羅泌路史列史皇栢皇中皇大庭栗陸昆連軒轅赫胥葛天尊盧祝融昊英有巢朱襄陰康無懷一十六氏于包犧氏之前亦與開山圖世紀六韜不



遂古記卷二  
合今則敘之于義農之間其年代闕而不論

遂古記卷二終



